

Ո Ր Ո Շ ՈՒ Մ

Ճանապարհային ոստիկանության վարչական տույժ նշանակելու մասին 04.12.2020թ. թիվ 2011960962 որոշումն անփոփոխ, իսկ վարչական բողոքն առանց բավարարման թողնելու մասին

<<26>> 01 2021թ. 7-13

775

ք.Երևան

Ճանապարհային ոստիկանության պետ, ոստիկանության գնդապետ Ե.Կարապետյանս, վերանայելով Տիգրան Հովհաննիսյանի ՄԴ/1915-21 դիմումի քննարկման արդյունքում ստեղծված նյութերը՝

Պ Ա Ր Զ Ե Ց Ի

Քաղաքացի Տիգրան Հովհաննիսյանը (**ծանուցման հասցե՝** քաղաք Երևան, Գարեգին Նժդեհ փողոց, 10-րդ շենք, 19-րդ բնակարան) դիմումով խնդրել է անվավեր ճանաչել Ճանապարհային ոստիկանության վարչական տույժ նշանակելու մասին թիվ 2011960962 որոշումը՝ նշելով, որ իրավախախտման ապացույց հանդիսացող տեսանյութում պատկերված չէ 5.15.1 ճանապարհային նշանը, քանի որ տվյալ ճանապարհային նշանը թույլատրում է երթևեկել 1-ին երթևեկության գոտիով միայն ուղիղ և կատարել շրջադարձ, երկրորդ երթևեկության գոտիով թույլատրում է երթևեկել միայն ուղիղ, իսկ երրորդ երթևեկության գոտիով՝ ուղիղ և դեպի աջ, մինչդեռ ՀՀ կառավարության 28.06.2007թ. թիվ 955-Ն որոշման 1-ին հավելվածի 1-ին ձևի 5-րդ՝ <<Հատուկ թելադրանքի նշաններ>> գլխի 6-րդ նկարում պատկերված 5.15.1 երթևեկության ուղղությունները գոտիներով ճանապարհային նշանը 1-ին երթևեկության գոտիով թույլատրում է երթևեկել դեպի ձախ և ուղիղ, երկրորդ երթևեկության գոտիով թույլատրում է երթևեկել միայն ուղիղ, իսկ երրորդ երթևեկության գոտիով միայն դեպի աջ:

Դիմումի քննարկման արդյունքում պարզվել է, որ վարչական ակտն ենթակա է կատարման՝ հետևյալ պատճառաբանությամբ.

<<Տեսանկարահանող և լուսանկարահանող սարքերով հայտնաբերված ճանապարհային երթևեկության կանոնների խախտումների վերաբերյալ գործերով իրականացվող վարչական վարույթի առանձնահատկությունների մասին>> օրենքի 3-րդ հադվածի 1-ին մասի համաձայն՝ վարչական վարույթի իրավախախտման հատկանիշների պարզման փուլում իրավախախտումը հիմնավորող ապացույցը իրավախախտումն ամրագրած տեսանյութն է կամ լուսանկարը, որը պարունակում է նաև տեխնիկական միջոցով արձանագրված տվյալները: Ըստ նույն հոդվածի 2-րդ մասի՝ որպես իրավախախտումը հիմնավորող ապացույց վարչական կամ դատական կարգով բողոքարկման վարույթում կարող են օգտագործվել Վարչական իրավախախտումների վերաբերյալ Հայաստանի Հանրապետության օրենսգրքի 251-րդ հոդվածով նախատեսված ապացույցները:

Վարչական իրավախախտումների վերաբերյալ ՀՀ օրենսգրքի 251-րդ հոդվածի 1-ին մասի համաձայն՝ վարչական իրավախախտման վերաբերյալ գործի ապացույցներ են համարվում ցանկացած այն փաստական տվյալները, որոնց հիման վրա օրենքով սահմանված կարգով

մարմինները (պաշտոնատար անձինք) հաստատում են վարչական իրավախախտման առկայությունը կամ բացակայությունը, տվյալ անձի մեղավորությունը այն կատարելու մեջ և գործի ճիշտ լուծման համար նշանակություն ունեցող այլ հանգամանքներ: Ըստ նույն հոդվածի 2-րդ մասի՝ այդ տվյալները հաստատվում են հետևյալ միջոցներով՝ վարչական իրավախախտման վերաբերյալ արձանագրությամբ, վարչական պատասխանատվության ենթարկվող անձի բացատրություններով, տուժողի, վկաների ցուցմունքներով, փորձագետի եզրակացությամբ, իրեղեն ապացույցներով, իրեր և փաստաթղթեր վերցնելու վերաբերյալ արձանագրությամբ, ինչպես նաև այլ փաստաթղթերով:

Ճանապարհային ոստիկանության Ճանապարհային երթևեկության կազմակերպման հսկողության բաժնի կողմից տրված տեղեկանքի համաձայն՝ Երևան քաղաքի Վ.Համբարձումյան - Երզնկյան - Բաղրամյան փողոցների խաչմերուկը՝ ՀՀ կառավարության 26.10.2006թ. №1699-Ն որոշման պահանջներին համապատասխան կահավորված է 5.15.1 <<Երթևեկության ուղղությունները գոտիներով>> ճանապարհային նշանով, ըստ որի ձախ եզրային երրորդ գոտուց թույլատրվում է երթևեկել ուղիղ կամ կատարել հետադարձ: Ճանապարհային նշանը առկա է եղել նաև 16.11.2020թ-ին, իսկ ՀՀ ճանապարհային երթևեկության կանոններում տրված է 5.15.1 ճանապարհային նշանի մեկ օրինակ, սակայն տվյալ նշանի սլաքների ուղղությունները կարելի է ընտրել խաչմերուկում երթևեկության կազմակերպման առանձնահատկություններից ելնելով:

ՀՀ կառավարության <<Ճանապարհային երթևեկության կանոնները և տրանսպորտային միջոցների շահագործումն արգելող անսարքությունների ու պայմանների ցանկը հաստատելու մասին>> 28.06.2007թ. թիվ 955-Ն որոշման 51-րդ կետի համաձայն՝ ոչ ռելսագնաց տրանսպորտային միջոցների համար երթևեկության գոտիների քանակը որոշվում է գծանշմամբ և (կամ) 5.15.1՝ «Երթևեկության ուղղությունները գոտիներով», 5.15.2՝ «Երթևեկության ուղղությունները գոտիով», 5.15.7՝ «Երթևեկության ուղղությունը գոտիներով» և 5.15.8 «Գոտիների քանակը» նշաններով, իսկ եթե դրանք բացակայում են, ապա վարորդների կողմից՝ հաշվի առնելով երթևեկելի մասի լայնությունը, տրանսպորտային միջոցների եզրաչափերը և դրանց միջև անհրաժեշտ միջկողային տարածությունը:

Իրավախախտումն արձանագրած տեսանյութերի ուսումնասիրությամբ պարզ է դառնում այն փաստը, որ Երևան քաղաքի Վ. Համբարձումյան - Երզնկյան - Բաղրամյան փողոցների խաչմերուկի հատվածում տեղադրված է 5.15.1 <<Երթևեկության ուղղությունները գոտիներով>> ճանապարհային նշան, իսկ << NISSAN>> մակնիշի 36DP099 հաշվառման համարանիշի տրանսպորտային միջոցը 16.11.2020թ. ժամը՝ 10:48-ին նշված վայրում միայն ուղիղ և հետադարձը թույլատրող երթևեկության գոտուց երթևեկել է դեպի ձախ, հետևաբար թույլ տվել Վարչական իրավախախտումների վերաբերյալ ՀՀ օրենսգրքի 124-րդ հոդվածի 1-ին մասով նախատեսված արարք:

Վարչական իրավախախտումների վերաբերյալ ՀՀ օրենսգրքի 124-րդ հոդվածի 36-րդ մասի համաձայն՝ ճանապարհային նշանների պահանջները չկատարելու համար սույն հոդվածի 1-ին մասով նախատեսված վարչական իրավախախտումն ունի նվազ նշանակություն այն դեպքում, երբ իրավախախտումն անխուսափելիորեն կատարվել է երթևեկության այլ մասնակցի

գործողության կամ անգործության պատճառով, ինչը նույնպես չի հիմնավորվել վարույթի ընթացքում:

Այսպիսով, դիմումատուի արարքում առկա են Վարչական իրավախախտումների վերաբերյալ ՀՀ օրենսգրքի 124-րդ հոդվածի 1-ին մասի հատկանիշները, հետևաբար նրան վարչական տույժ նշանակելու մասին որոշումն օրինական է և իրավաչափ:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական տույժ նշանակելու մասին 04.12.2020թ. թիվ 2011960962 որոշումը թողնել անփոփոխ, իսկ վարչական բողոքն առանց բավարարման:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան՝ օրենքով սահմանված կարգով և ժամկետներում:
3. Սույն որոշման օրինակն ուղարկել Տիգրան Հովհաննիսյանին:

Կատարող Կ.Ահարոնյան
Հեռ. 011544783



Ե.Կարապետյան